

Estd: 1984

January 2013

RAMTHAR

(MISSION)



Email : ramtharchanchinbu@gmail.com
Fax No. 0389-2316410



KUM THAR CHIBAI



**MISSIONARY - 111
TIRHCHHUAHTE LEH BOARD HOTUTE
NI 6 JAN 2013 BUNGKAWN KOHRAN**

Kum Thar Thuchah: Moderator phêk - 2
Kum Thar Sermon: 'In kawngte chhût ngun rawh u' phêk - 10

Ramthar Association Chanchinbu Thlakip Chhuâk**Editorial Board 2013-15**

Editor	: Rev. Thangzauva	9612950043(M)
Joint Editors	: Upa Rinmuana	9436142643(M)
	Upa Zoramthanga	9436362385(M)
	H.Laingûrliani	9774390980(M)
News Editor	: Lalbiakenga Fanai	9436366234(M)
Manager	: R. Lalchhanhima	8575013800(M)
Publisher	: Rev. Lalchhuanmawia	9615952406(M)

Member-te:

Rev. Lalramliana Pachau	: Synod Moderator
Rev. H. Lalrinmawia	: Synod Secretary (Sr.)
Rev. P.C. Pachhunga	: Exe. Secy./c.Mission etc.
Rev. C. Chawngliana	: BEC Member
Upa F. Lalfakzuala	: BEC Member

Kum khat lâk man ₹ 50.00

- > Thu chhuah tur nei chuan Email- ramtharchanchinbu@gmail.com -ah emaw phêk leh lam chauhah ziakin Editor emaw Manager, Ramthar Chanchinbu, Synod Office, Aizawl -796001, Mizoram, India, hnenah thawn tûr a ni e.
- > Ramthar chanchinbu thu chhuahte hi a ziaktu mawhpurhna a ni e.

A CHHŨNGA THU AWMTE

		<i>phêk</i>
1. Editor Thuchâng	-	3
2. Moderator Kum Thar Thuchah	-	4
3. Keimahni	-	5-6
4. Supervisor of Schools report tawi	-	5-7
5. Hriatzauna Huâng	-	10
6. Ramthar Chanchinbu Hluttute Huâng	-	11
7. Sermon : 'In kawng te chhũt ngun rawh u'	-	12-13
8. BUHHMUN AṬANGIN:		
(1) 'Kaphal Pakyo'	-	14-15
(2) Thlânmuah neih loh vanga buaina	-	16-17
(3) Hindu puithiam aṭangin...	-	18-19
(4) Sikul rawngbâwlna rah	-	20-21
(5) Ghumaonetaar hmuna Field pum huap...	-	22-24
(6) Missionary chenna In kâng	-	25-26
9. Field Tlawh Report	-	27-33
10. Zawhna leh chhânna	-	34
11. Synod Bookroom News		



EDITOR THUCHÂNG

Engkim tân hian hun ruat a awm: 2013

hi hun leh kum inher danglamin a her chhuah ni mai äwm a ni. Mahse, chuti ngawt chu niin a lang lo, Pathian khawngaihna nang leh keiin kan dawn avâng chauhva nang leh kei atân pawh ‘Kum Thar’ hi kan nunin a tawng a ni chauh zawk. Engkim tân hian hun ruat a awm avângin, kan rawngbâwlpuite ngei leh kan nu leh pa, u leh nau, thian tha leh khawvêla kan thlâkhlelh leh ngaih ber ber eng emaw zat chu he khawvêl atân an hunbi a kim ta. Anmahni ngaiin tap chungin mittui nen kan au ding zo ta lo zawng an nih kha maw! Hlim taka tu dang ngai lova kan nuihpui leh kan châk zawng leh duhzawng ang anga tual kan châiho lai kha mitthlâ mai an chang zo ta. He hun leh kum inher liam hian mi chak leh thiltithe, mi fing leh mi mâwl, hausa leh rethei, hrisel leh bawrsâwm, lal leh chhiahhlawh, mi taima leh thatchhia mi tu mah reng a thlei hrang miah lo, engkim tâna hun ruatsak kan nihna ang takin kan hun theuhah min her liampui mai a ni. Chu hunbi chu engtikah nge nang leh keia chungah hian a bi a kim ve ang le?

Thuhriltu chuan, “Tin, i vânglai hian i siamtu hre reng rawh. Ni tha lote a lo thlen hma leh lâwmna rêng rêng ka nei lo ve, i tihna tûr kumte a lo hnaih hma hian...(Thur. 12:1)” tiin min hrilh. Kan rawngbâwlpui pakhat chu, Cancer natna pai a nih inhre miah hek lo, cancer natnaah pawh a rang chi lehngal hi a lo pai reng niin, kar khat chung lek in mual min liamsan zu nia. Khawvêla nungdama la awm leh Pathian rawngbâwl la châk ngawih ngawih ni mah se, a hunbi a kim ta mauh si a le! tihngaihna dang reng a awm ta lo.

Kan Pathian thuin engkim tâna hun ruat a awm thu min hrilh a, chu hunbi ruat chu kan tâna hunbi a kim hma leh kumin ‘Kum Thar’ kan lo thlen hian, hun kal ta zawng aia thahnem zawka Lalpa tâna thawk tura kan inpêk a va tul êm!

• • •

MODERATOR KUM THAR THUCHAH



Rev. Lalramliana Pachuau
Moderator

Ramthar Chanchinbu chhiartu zawng zawngte kan Lalpa Isua Krista hmingin Kum Thar chibai ka bûk a che u. He kum thar hian malsawmna thar thlen theuh che u rawh se.

Ramthar rawngbâwlina hmun hrehawm taka thawktu zawng zawngte chibai ka bûk che u a, in thawhrimna Lalpan malsawm che u rawh se.

Ṭhahnemngai taka Ramthar rawngbâwlina atâna mahni inpê leh sum leh pai thawh ṭhin te, Missionary châwmtu zawng zawng te inpêkna pawh Lalpan malsawm zêl rawh se.

Kumin 2013 hi ringthar ngah kum, “**a vûr kum**” ni tûrin, kan puan ven sawi chhngin, thlarâu tharin i han thawk leh teh ang u hmiang. Mission neitu Pathian (*Missio Dei*) a lâwm dawn êm asin! Keini pawh a hnên kan thlen huna, “**Bawih ṭhahnem lo kan ni e...**” kan tih hunah chuan kan lâwm dawn êm a nia!

“Kan theihtawp i chhuah mawlh ang,
Ni a lo kiam sâwt êm e!”

• • •

KEIMAHNI

† **Ramthar Office hawng:** Ni 7 January 2013 (Thawh tanni) khan Mizoram Synod Office hawn tan a ni leh ta a. Ramthar Office pawh Rev. P.C. Pachhunga, Executive Secretary i/c. Mission, Rev. Lalchuanmawia, Secretary, SMB (Term 2-na) leh Upa Lalrinmuana, Coordinator thar te nen changtlung takin ni tin rawngbâwl hna an tan leh ta.

† **Ramthar Thawktu Pension-te:** Jan. 2013 a tângin heng kan rawngbâwlpuite hian mi an pension san ta: (1) Pu Saidinga Sailo, Mission Promoter (2) Pu R. Sangkhuma, Home Mission (3) Pu Lalrohlua, Tripura (4) Pu JH Lalramnghaka, MTC (5) NI. K.V. Tlangmawii, Tripura (6) Pi Vanlalneihi, Home Mission

† **Ramthar Chanchinbu Editorial Board Member ruat thar:** Kum 2010-12 chhûng Editorial Board Member-te a kâwm chhûnga kan hmuh ang hian kum 2013-15 atân ruat thar an ni. January 2013 thla pawh hemi avâng hian a chhuak tlai ta deuh hlek a, Kohhranho hriatthiamna Editorial Board-in a ngên a ni.

† **Ramthar Chanchinbuin hma a sawn:** Kohhranho thahnemngaihna azârah Ramthar Chanchinbu hi kum 2012 chhûng khan bu 1500-in a pûng a, Bu 25,000 chhut thin a ni. Kum 2013 January thleng hian Bu 300-in a pûng leh ta. Lalpa chu fakin awm rawh se.

† **Ramthar Chanchinbu Semtute leh a latute hriat tur:** Kum 2013 a tâng chuan Ramthar Chanchinbu Semtute leh a latute'n February a tâng chuan *Code* thar in nei vek tawh dawn a, in *code* hi in Hming/Bial sawi kher ngai lova awlsam taka Khawhlthluaknei (Computer) hmanga zawn chhuahna tur a nih tawh dawn avângin in hriat reng a tul tawh dawn a, hetiangin: *Code A5* tih ang hian a ni ang. Hna awlsam zawkna turin hei hi khawngaih taka lo hre turin Editorial Board-in a ngen takzet che u a ni.

† **Damdawi In awm:** Pu C. Kapthanga, O/A Hqrs., Office chu hriatna thazâm fel lo avângin Synod Hospital-ah tunah hian enkawl mek a ni, i tawngtaisak ang u.

† **Tuarpuina:** (1) Ni 8th Nov. 2012 zan dar 10:15 vel khan Cambodia-a Synod Tentmaker Missionary NI. Vanlalhruii chu a pa Pu Tialhnuna (65) Aizawl Venglai chuan Cancer natna avângin a boralsan. NI. Vanlalhruii (Mami) hi kum 2008 a tângin Cambodia ramah Synod Tentmaker niin rawng a bâwl tan tawh a ni. Lusûn chhûngte hi Synod Mission Board hnuai a rawngbâwlpuite'n Pathian thlamuanna leh awmpuina an chan ngei duhsakna sâng ber kan hlân a ni.

(2) Ni 03 Jan. 2013 (Ningani) khan Pi Lalramhlupuii Khiangte, Office Assistant, SMB Hqrs. Office chu vanduaithlâk takin a nau pai mipa chu thla riat mi niin mihring a tling zo ta lo hlah mai a, Synod Office-a thawktute'n kan tawrhui takzet a ni.

† **Ringthar:** (1) Ni 28-30 Sept. 2012 chhûng khan Masihi Sangati Crusade, Khuangphah Kohhranah neih a ni. He Crusade senso atân hian Rs. 50,000/- lai hi T.Upa Vivala, Chanmari Kohhran, Aizawla miin a pê a. Pathianin mal a sâwm a, ringthar 22 laiin Baptisma an chang.

(2) Ni 15-18 Nov. 2012 chhûng khan Dr. Robert Haliday ruaiin Cachar Tlângram, Ronpur Bial huap programme-in Tihdam Rawngbâwlina (Healing Ministry) an buatsaih a. Puitling 2, Naupang 3-in Baptisma an chang.

(3) Ni 19 Nov. 2012 khan Rev. Munshi Hembrom chuan Dhawa Fellowship-ah puitling 2 baptisma a chan tir leh ta. Ti hian kuminah mi 409 in Jharkhand Mission Field-ah Baptisma an chang ta.

(4) Arunachal East Field Secretary chuan heti hian a sawi, "Kan pasalthate fehchhuakin a ki hreu an rawn hawn ve hlah mai. Pasalthate kuhmumah Field Secretary a pâr e" tiin. Ni 18.11.12 (Pathianni) khan Fld.Secy., hian Dr. Samtu Ngemu chu Jairampur Biak Inah Baptisma a chantir a ni.

SMB SUPERVISOR OF SCHOOLS REPORT

Kum 2012 chhûnga SMB hnuai Kristian leh Kristian ni lo Sikul naupang kan neih dan dinhmun hetiang hi a ni:

Barak Area Church & Mission

1. Oriental High School, Silchar:
KG I-X Zirlai Kristian - 115 Kristian ni lo - 549 = 664
2. RM High School, Karimganj
3. Mission School, Gharmura:
KG I -VII Zirlai Kristian - 108 Kristian ni lo - 149 = 257
KG I - X Zirlai Kristian - 54 Kristian ni lo - 936 = 990

TRIPURA MISSION FIELD

1. Calvary H/S Tuidu			
KG I - X	Kristian 643	Kristian ni lo 137	780
2. Bethlehem E/S Noagang			
KG I - X	590	42	632
3. Elpis English School, Pecharthal			
KG I - VIII	29	160	189
4. Charisma English School, Karbook			
KG I - VIII	141	239	380
5. Harmon English School, Burburia			
KG I - VIII	48	78	126
6. Maranatha Eng School, Ambasa			
KG I - VII	119	128	247
Total :	1570	784	2354

ARUNACHAL & ASSAM 'E' MISSION FIELD

1. Tangsa Model School, Khasan			
KG I - X	Kristian 340	Kristian ni lo 120	460
2. Jeruel English School, Lakla			
KG I - X	137	385	522
3. Bethel Eng School, New Khamlang			
KG I - V	105		105
Total :	582	505	1087

ARUNACHAL & ASSAM 'W' MISSION FIELD

1. St.Peter H/S, Madhuripathar			
KG I - X	Kristian 118	Kristian ni lo 417	535
2. JMS, Laimekuri			
KG I - VIII	18	329	347
3. JMS, Simenchapori			
KG I - VIII	35	223	258

Home Mission South

1. SHMS, Zehtet			
Nsy -VIII	Zirlai Kristian	- 175	Kristian ni lo - - = 175
2. SHMS, Vaṭhuampui			
Nsy -VIII	Zirlai Kristian	- 156	Kristian ni lo - 1 = 157
3. RTMS Bungtlâng South			
KG -IV	Zirlai Kristian	- 394	Kristian ni lo - 1 = 395
4. SHMS, Tlabung			
KG -IX	Zirlai Kristian	- 265	Kristian ni lo - 10 = 275
5. SHMS, Zawlpu			
CI I -VIII	Zirlai Kristian	- 226	Kristian ni lo - - = 226

6. SHMS, Saibawh			
Nsy -IV	Zirlai Kristian	- 37	Kristian ni lo - 67 = 104
7. SHMS, Hmawngbu			
KG -IV	Zirlai Kristian	- 120	Kristian ni lo - - = 120
8. SHMS, Kawrthindeng			
Nsy -V	Zirlai Kristian	- 140	Kristian ni lo - - = 140
9. SHMS, Khawmawi			
Nsy -V	Zirlai Kristian	- 199	Kristian ni lo - - = 199
10. SHMS, Buknuam			
Nsy -IV	Zirlai Kristian	- 42	Kristian ni lo - - = 42
11. SHMS Diblibagh			
KG-IV	Zirlai Kristian	- 25	Kristian ni lo - 75 = 100
12. SHMS, Tuikawi			
Nsy -V	Zirlai Kristian	- 25	Kristian ni lo - 59 = 84
13. SHMS, Putlungasih			
KG -VI	Zirlai Kristian	- 165	Kristian ni lo - - = 165
14. SHMS, Parva-I			
Nsy -IV	Zirlai Kristian	- 63	Kristian ni lo - 65 = 128
15. SHMS, Damdep-I			
KG -IV	Zirlai Kristian	- 81	Kristian ni lo - 65 = 146
16. SHMS, Tuichawng			
KG -IV	Zirlai Kristian	- 40	Kristian ni lo - 65 = 105
17. SHMS, Malsury			
KG -IV	Zirlai Kristian	- 29	Kristian ni lo - 55= 84

Home Mission North

1. Salem Boarding School, Salempara			
KG-IV-X	Zirlai Kristian	- 179	Kristian ni lo - - = 179
2. SHMS, Marpara			
Nsy -VIII	Zirlai Kristian	- 121	Kristian ni lo - 83 = 204
3. RTMS Tuipuibari- II			
KG-I-VIII	Zirlai Kristian	- 42	Kristian ni lo - 133= 175
4. SHMS, Thaidawr			
Nsy -IV	Zirlai Kristian	- 127	Kristian ni lo - 24= 151
5. SHMS, Sihthiang			
Nsy -IV	Zirlai Kristian	- 162	Kristian ni lo - 9 = 171
6. SHMS, Chhimluang			
Nsy -IV	Zirlai Kristian	- 76	Kristian ni lo - 30 = 106
7. SHMS, Damparengpui			
KG -IV	Zirlai Kristian	- 180	Kristian ni lo - - = 180

8. SHMS, Zomuantlâng

Nsy -IV Zirlai Kristian - 19 Kristian ni lo - 54 = 73

Karbi Anglong Mission Field

1. PMS, Diphu

KG I-X Zirlai Kristian - 230 Kristian ni lo - 184= 414

2. PMS, Hamren

KG I-X Zirlai Kristian - 208 Kristian ni lo - 280= 488

3. PMS, Koilamati

KG I-X Zirlai Kristian - 321 Kristian ni lo - 7= 328

4. PMS, Silonijan

KG I-VIII Zirlai Kristian - 151 Kristian ni lo - 72= 223

5. PMS, Sarihajan

KG I-VIII Zirlai Kristian - 73 Kristian ni lo - 145= 218

6. PMS, Jengkha

KG I-V Zirlai Kristian - 80 Kristian ni lo - 131= 211

7. PMS, Longnit Borjan

KG I-III Zirlai Kristian - 40 Kristian ni lo - 171= 211

Cachar Tlângram

1. Winchester School, Ramhlun

KG I-VIII Zirlai Kristian - 143 Kristian ni lo - 21= 164

2. Mission School, Telkata

KG I-IV Zirlai Kristian - 40 Kristian ni lo - 6 = 46

3. Mission School, Bagbahar

KG I-IV Zirlai Kristian - 26 Kristian ni lo - 11= 37

4. Nazareth Eng. Med. School, Zaite

KG I-IV Zirlai Kristian - 135 Kristian ni lo - - = 135

5. Gilead Eng. Med. School, Baruatila

KG I-IV Zirlai Kristian - 109 Kristian ni lo - 19= 128

6. Mission School, Luipui

KG I-IV Zirlai Kristian - 17 Kristian ni lo - 5 = 22

Jharkhand Mission Field

1. Genesis School, Lodiha

KG I-VI Zirlai Kristian - 33 Kristian ni lo - 141=174

BELHKHAWM Kristian - 7496 kristian ni lo 6329= 13825

ZIRTIRTU DINHMUN

(1) Sikul neih zat - 57(4) Thawktu dang - 222

(2) E/T Missionary - 666(5) Hmeichhia - 343

• • •

HRIATZAUNA HUÂNG:

■ **China rama hruaitu thar an neih avângin Kristiante'n tlêmin beiseina thar an nei:** Xi Jinping-a chuan ni 14.11.12 khan khawvêl ram lian ber pawla hruaitu thar tur chuan a thutthleng a luah a. Kristiante chuan inthlan hma a tângin ani a lo tlin chuan hmasawwna hmuh ngei an beisei a ni. Hi Jintao leh Xi Jinping te chuan Communist Party hian siam that a tûlzia an târlang a. Kristian Thuhrûkte mi makduai sawm têt, sawrkara intulût duh lote chuan hmuhsit, tihbuai, sawisak, hnathawka rawih luih leh harsatna dang tam tak an tuar nasa êm êm a ni - *Ni 15.11.12 Posted in China, Countries News.*

■ **Aigupta Muslim Sharia dan khirh tak kârah Saudi rama rorêlna chu Kristiante'n an hlau:** Suria khawpui Cairo-ah chuan an ram Muslim sakhaw dan khirh tak, buai zual zelna zakhua a ni ang tih hlau mipuite'n Zirtawpni (9.11.12) khan kawng an zawh. Kristiante leh Liberal hovin he dan hi *democratic* zulzuiin, sakhaw tin zalêna a nih theihna tura ngenna an siam chungin, Saudi rorêlna, Muslim ni loho chêpna dan an duang lâwk - *Ni 15.11.12 Posted in Countries, Egypt, ICC News*

■ **Pathian awm ring lote ngenna:** Pathian awm ring lo hovin US President rinawmna thutiamah (Presidential Oath) "Pathian, min tanpui rawh - So help me God" tia sawi leh Bible tibo tûrin an ngen. Sakhaw bulpui a tâng a zalenna duh pawl chuan USA President Obama hnênah, 'Pathian min tanpui rawh' tia sawi thin leh thutiam laia Bible chung a kut nghah chu January ni 20, 2013-ah President ni tûra thu a tiam laiin ti lo tûrin an ngen a. He dan hi George Washington-a hun lai a tâng tawha an lo chin thin, mi tlêmtê tih loh chuan thutiam laia an tih vek dan a ni. - *Ni 15.11.12 Posted in Countries, News, United States*

■ **India rama Kristian tihduhdahte chu:** India-a Kristian tihduhdahte chu Kristian zawng zawngte entawntlâk (Model Christians) an ni tiin - *Ni 15.11.12-a Tags, Asia, India chuan a târlang - Posted in Asia, India.*

• • •

‘RAMTHAR’ HLUTTUTE HUÂNG:

Upa Lalawikunga, Armed Veng hi Ramthar Chanchinbu a nginat leh hlut dan hi a ropui khawp mai. ‘Zoramah Pathian Thiltih Mak a thleng’ tih thu a ziah chu chhuah tura Ramthar Chanchinbu enkawltute’n an hmuh leh hmuh loh a rawn zawt a. Kan lo la hmuh si loh avângin a chênna Armed Veng aţangin Ramthar Office-ah a lo kal a, amah ngeiin a thuziak chu a rawn dah ngat a ni. “Ramthar Chanchinbu chhiar hi manhlâ ka ti êm êm a, ka hlâwkpuî thîn teh ania, a lo thlen hlan hi ka nghâkhlel hliah hliah mai thîn” tiin, hahîpin Ramthar Chanchinbu a hlutsak zia a sawi bawrh bawrh mai a ni. A upat tawh ngaihtuahin a viak a la ţa êm êm mai bawh.

Ramthar Chanchinbu hi a hma chuan kan la ngai lo va. Kumin 2012 aţang hian kan la ţan ve chauh va. Kan chhûngkua chuan ngaihnawm kan ti a, chhiar hlan kan nghâkhlel hle thîn. Hemi avâng hian ţawngtai thupui turte kan hriat belh a, Central India lam kan rawngbâwnate leh hmalâknate hriat belh zêl kan duh e. In rawngbâwna Lalpa’n malsawmin tichak zêl che u rawh se.

HRIATTIRNA LEHNGENNA

Kumin 2012 North East huam chhûng ‘Missionary Retreat’ thu leh hla kha a bua siam a ni a. Field tina mawhphurtu leh Missionary-te’n mahni leh Field tan Ramthar Pisa puiah a rang thei anga lam tura ngen leh hriattir in ni e.

Sd/-

UPA H. NGŨRKHŨMA
Mission Promoter

KUM THAR SERMON



Rev. K. Lalpiangthara

IN KAWNGTE CHU CHHÛT NGUN RAWH U

Hagaia 1:5-7

Kamkêuna : Kum 2012 kan hmang zo va, kum 2013-ah kan chuangkai leh tan mêk a ni a. He hun hi khawvêla sawrkar lian leh ropui tak takte pawhin thil an tih theih avânga an dai lâwk theih bik loh, khawvêla mi zawng zawngin a ruala kan hman tlan a ni a. He kum thar hi mahni kawng ngun taka chhût a, zawhtute tan chuan 'kum vannei' a ni ang a, chung lam en nachang hre lova dai bawrh bawrh tan chuan 'chhiat kum' a ni dawn a ni. Britain rama lawng *company* lian tak *White Star Line Company* in an siam Titanic lawng - a dung a nih kha.

feet 882.5 laia sei, feet 200 dawna sang; pil thei lo tur hiala an ngaih, Pathian meuh pawhin tipil thei lo tura an ngaihin chhiatna rapthlak tak mai a tawhna chhan kha thil dang ni lovin, an kawng an chhût ngun loh vang a ni. Californian lawng a tângin an hma lama vurtlang lian pui pui a awm avânga fimkhur tura an hrilh engah mah an ngai lo va, khawvêl hriata chhiatna rapthlak tak an tâwk ta

Hetiang hian kan kawng kan chhût ngunna turte han târlang ila:

1. Khawiah nge kan awm i chhût ngun ang u :

Mahni awmna leh thlen chin pawh hre lo ringtu a awm theih. Âr-khawthim-dai mai mai tur a ni lo. Tirhkoh Paula'n, "Rinnaah chuanin awmemaw, nangmahni ngei inchhin thîn ula, nangmahni ngei infiah thîn rawh u," (2 Kor 13:5) a tih hi inenfiah nân i hmang thar leh

ang u. Mite tih vanga ti ve ringawt zel lovin, nangmah ngeiin thlarau lam nunah daihriatna nei ang che. I thlen chin Lalpan a zawt a che.

2. Rah kan chhuah em tih i inhhût ngûn ang u :

Tualchhûng a ni emaw, ram chhûng a ni emaw, ram pawn lam a ni emaw; rah kan chhuah em? tih hi i inzâwt ang u. Kan Lal Isuan, “Va rah tûr leh in rah awm reng turin ka ruat baw k a che u,” (Joh.15:16) a tih kharawngbâwlna kawng kan zawh mêk lai hian i chhût thîn ang u. Hlawh tam tak la si a, rah chhuah miah lohte pawh hi a awm ve thei a nia! Kan senior tawhna leh hna kan thiam viauna te hi inawihtlei nân hman a hlauhawm khawp mai.

3. Kan dam chhûng hun a tawi tih i chhût ngûn ang u :

Mosia chuan a tawngtainaah dam rei dil lovin, a dam chhûng rei lote hman dan a thiam theih nan, “Kan dam chhung nite chhiar dan tur min zirtir ang che, finna thinlung kan neih phah hialna turin,” tiin a dil a. Kan dam chhung hun tawi te hi thawnthu angin kan la titawp ve

dawn. Pathian thin tihrim nâna kan hman ral loh nân leh Pathian leh kan mihringpuite ngaiha kan thawnthu zia k ngaihnawm taka kan tihtawp theih nân kan kawng i chhût ngun ang u.

4. Kan chung a thil lo thleng tûr kan hriat loh avângin kan kawng i chhût ngun ang u :

Jakoba chuan, “Naktukah chuan eng nge lo awm dawn tih in hre si lo. In nunna chu eng nge ni? Chhum rei lo tê lo lang a, ral leh ta mai thîn ang hi in ni si a,” (Jak 4:14) a ti a. Titanic lawng khalhtuten an hma lama thil thleng tur an hre lo va, an chhe rup ang khan tuman kan chung a thil lo thleng tur kan hre lo. Mahni tun hun theuh kan hman that a, Lalpa nena ni tin lêng dun nun kan neih a pawimawh. Mahni kawng chhût nguna Lalpa tihna nena lêng dun thînte hi vânah pawh Lalpa nena lêng dun turte kan ni.

Kan kawngte kan chhût ngun a, kaldan kan thiam theih nân Lalpan a thu malsawm rawh se. Amen.

(Hun chép tak kâra kan ngênna min tihhlawhtlinsak hi Rev. K. Lalpiangthara chungah Ramthar Editorial Board-in thinlung takin lâwmthu a sawi tak meuh a ni.Ed.)

Buhmun aţangin:**“KAPHAL PAKYO”***K. Lalrozama, Nepal*

Thlen hlim harsatna : Inrinni, kan inkhawm ni a ni. Sabbath serh kan ang ţan ve ta der mai. Kan danglamna chu vawksa ei thiang kan ni. Kan inkhawm hruaitu chuan *Praise and Worship* min tihpui a, kan zai a, ‘*action song*’ ang main, ‘*kan kutte pharin*’ tih laiah chuan kan kut kan phar a, ţawngţai rualin kan chhunzawm a. Kan ţawngţai tâwp mai dawn emaw ka tih laiin hla kan han sa leh phawt a. Chutah hruaituin ţawngţaiin hnu a khar ta a. Tih ţhan hma chuan kan hmaa mite ang thovin kan zeî lo va, tih fo takah chuan ngaiah kan nei ve mai a. Kan Pastor-ten inneihna an han sawngbâwl a. Hmai khuhna hawntir an theihnghilh châng a awm, hmeichhia in zungbun a buntir hun pe ta lova inneih program zawh hnua inbuntir ta nawk nawk lah bo lo. Heng zawng zawng hi kan *Veng* tih dan a lo ni si lo va. Tih dan ţha ber nia kan lo vawn tawh kha ‘*zei lo*’ nih kan hlawh phah ta a ni. A ram mite tih dan hi eng chen nge kan kalpui ţha ang tihte min ngaihtuahtir ve a ni.

Khanghu Theology of Mission : Kan vêng pa chu khanghu chîng ţhin a ni a. “Khanghu rilru ka hria” a ti. “Khanghu chu a bula mite aia sâng bera awm tumin a bula thing hi a zem a zem a, sâng berah awm a tum ţhin,” a ti. Ani chuan a enkawl khanghu duh dan takin, khanghu aia sang reng reng chu a kit vek a, sang berah a dah a, mahse ama duh anga lawh awlsam tura hniam si-ah a siam ţhin a ni. Ramthar Field hrang hrang kan enkawl dan tur chipchiar zawk neih hlan a nghahhlelawm hle mai.

Thangfenpabawp theology of Mission: Kan thupui, ‘*kaphal*

pakyo’ tih hi Nepali ţawng a ni a. Thangfenpabawp hrâm ri an hriat dan a ni. ‘*Kaphal*’ chu ‘*keifang*’ tihna a ni a, ‘*pakyo*’ chu ‘*ahmintae*’ tihna a ni. Mizoram te, Assam-a Karbi ram te, Nepal rama Thangfenpabawp hram dan hi a inang chiahin ka hria. Mahse a hrâm/sawi ri kan hriat dan a inang lo vek. Nepali-ho chuan ‘*kaphal pakyo*’ a ti niin an hria a. Karbi-ho chuan ‘*vosobiku, rit nong me lo*’, (*vosobiku, lo lam khawih a hun ta e*) a ti niin an hria. Hengho bulah hian ‘*Thangfenpabawp*’ a ti, ti ţalh ila kan hneh har phian mai thei a ni. ‘Mission ralrêl dan’ tih,

Pu Lalnuntluanga zia lehkhaw kawma hnam hrang hrangin Isua hmêl nia an rin dan inziak chu a inang lo nasa hle mai. Ni-a kan hriat ber kha, *'hei zawk hi Isua lem dik tak zawk a ni e'* va ti ila an rilru a hmin lo mai thei a ni.

Ka hriat ve chinah chuan Nepal ramah hian *'Christmas carol'* tih chuan Kohhran in tina kalin lâ, zai, thusawi tawngtai rual adt. tih ngei turah kan ngai, a pui a nawiin kal kan ching. Mizoram-ah leh hmun dangah kha chuan a dang leh deuh va. *Carol* tih ri kan beng a rik ruala a tih hmang kan suangtuah a inang lo va. Kan va tih dan dang mahse *'Carol'* a ni vek maiin ka hria.

Nepal ramah hian *'Baptisma'* kan pêk dan a dang a. Baptisma changtu tam takin a awmzia an Chiang lo, a tawng bul lam an hre lo, mi tam takin *'Baptisma'* nia an hriat chu *'Hnim'* a ni. Chuti a nih chuan a tula hmunah chuan *'kan veng'* tih dan kher lo deuhthe pawh hi tih theih ni se aw ka ti thin. Kan pawm tho baw si a. Mahni khaw lamah chuan mahni tih dan tê-a *'Au'* tih pawh a paw lovang a,

'O' tih ve mai a tula hmun a awm thei baw ang.

Kan tih dan hi a that teh reng nen zirtirna dik lovah ngai an awm leh tlat thin. Kan Mission a thawk ngei, *Field Worker* NI Phobi Lama pawh hian *'thlawr'* hi a pawm thei lo va. Baptisma chungchâng a hranpa ngatin lehkhaw pawh kan siam a. A hmin zo ta chuang lo va, min bansan ta nghe nghe a ni.

Kan Kohhrana tel duh, kan tih dan an pawm loh vanga hmun danga baptisma chang ta an awm tih kan thawhpui Maria chuan min hrilh.

Tuna kan Kohhrana Baptisma changte hi chuan a nih ang ang hian an pawm ve mai a, Kohhran dang rawn lûtte hi chuan la hawi buai deuh nite pawhin a lang. Tin, hma thar lain kan huang kan zauh zel dawn a ni a, min hrethiam lotu an la awm zel dawn a nih hmel. Kan kalpui zel dan turah eng nge tha ber ang tih ngaihtuah ngai tak a ni. Karbi Bible-ah chuan *'Jentail'* tih aiah *'Juda mi ni lo'* a ti mai a, sawifiah a ngai hran lo. Hrilhfiah vak ngai lo an hriat thiam sa kalpui mai hian an lung a dam zawkin kan thatpui zawk ang em le? //

(Baptisma chungchâng hi chuan sawi a hlawn kumkhua dawn ta ni pawhin a lang....sawi hlawn zing tak zawng a ni e....Ed.)

THLÂN MUAL NEIH LOH VANGA BUAINA THIH NGAM A NI TA LO

*Rev. Zorammawia,
Field Secretary, Tripura*

Bunghmun lal Hrangvunga Sailo, Mission Venga Presbytery Inkhawmpui April 1911-a neih tuma Bunghmun Upa atâna nemngheh, Phuldungseia pêm thla hmanga Tripura ram pum puia Chanchin Tha darh ta, a hnu daih 1986-a Presbyterian Kohhran din vawi hnihna atanga Kohhran member 776-te lo pung zel chu Synod Mission Board-in chawmin member a tipung zêl a. Vawinah chuan Presbytery pali neiin Pastor Bial-16, Kohhran - 93, Preaching Station/Branch Church-169; Upa-121, Kohhran Danzawhkim -17,536, Kohhran member zawng zawng-20,764, A ram mi Pastor 6, tirkkoh 28 an ni.

Ringthar hi January atanga October, 2012 chhûngin 1269 lai Lalpan min pe tawh a. Kohhranhote tawngtaina liau liau a ni e. Ringthar neih hi a harsa tual tual dawn niin a lang. Kristian ho hi inphum thin kan lo ni a, kan ringtharte hi inphum loh chu a duh lo hlei hlei an ni mai si a. Inphumna tur thlanmual lah chu neih ngawt theih a ni mang si lo, leina tur pawisa a awm loh chuan. Kum 2010 khan Burburia biala Jamatia khaw pakhtah kan mite an thi a. An leilet sirah an phum a. An khawtlâng roreltute Jamatia Hoda-ho chuan an sawisel a, phawrh leh turin an ti a. Kan buai hle mai a, Amarpur Sub-Divisional Magistrate-ah hêkna an theh lut a. Mitthi phum hian kan khawtlâng a

tibawlhhlawh, sakhaw thilah min tibawlhhlawh an ti tlat mai a, a buaithlâk khawp mai. Burburia-a Kristiante leh thawktute chu SDM Office-ah koh an ni a. Amaherawhchu, Engkimtithei Pathian hual himna hnuaiah buaina te min chin felsak ta rih a. Thih leh pawh ngam awm loh tak a ni ta. Kan thih leh vaih chuan buai kan hmachhawn leh mai dawn a ni pawt mai a.

Kum 2009 khan Ambassa-a kan Kohhran Upa nupui a thi tlat mai a. An ramah phumna tur awm si lo, thlanmual nei baw si lo, Pastor pawhin tih ngaihna hre bik hek lo le. Phumna tur hmun awm si lo, hal an duh baw si lo, mangan tawpah chuan Mission Compound ram kil zum, Vai

hovin neih tuma an nêk an nêk
laiah an phûm ta ngawt a. Ram
buaï chin fel nan chuan a tha
phian mai. Phûm zêl chi ni baw
si lo, hmun pawh awm baw hek
lo le. Kan mangang hle mai. A
hnu daihah Chanmari Kohhranin
thlân mual ram leina tur an rawn
pe a, Ambassa Pastor hovin an
buaipui a, an lei fel tawh ang chu
maw!

Chutiang harsatna chu kil hrang
hrangah hian a awm ta nual mai.
Jampuijala-ah chuan kan ringtute
hlauhthawn ber chu thlân mual
kan nei si lo va, kan thih hunah
engtin nge ni ang tih hi a ni.
Tirhkoh rilru an tibuai hle a. Ring
lote Pathian thu an hrilh pawhin
thlân mual kan nei si lo va, thi ta
ila engtin nge ni ang? tih hi
chhuanlam lian takah an neih a.
Ringtute rilru kaptu a ni a,

Kristiana inpe duhte inpêk ngam
lohna a ni bawk. Thlân mual ram
neih a ngai a, sum a awm loh
chuan ram neih ngawt theih a ni
si lo va, Jampuijala-ah chuan
ringtu ni duh thlân mual neih loh
vanga ringtua inpe ngam lo kan
ngah sâwt hle.

Mizo Kristian rilruah chuan a ho
hle ang le. A pawimawh zawk
nunna ngai thupui mai se aw kan ti
ngei ang. Mahse anni tân chuan
kan ngaihtuah angin an ngaihtuah
ve tlat lo va. Mahni ramah pawh
khawtlângin phûm an phal baw
si lo va, khua atanga a hranpaa
thlân mual ram kan nei a nih ngawt
loh chuan Jampuijala-ah chuan thih
mai mai ngam pawh a ni rih lo a ni.
Engtin nge kan tih ang le.
Ringtharte rilru nuam taka an thih
theihna tur hian kawng tha hria
kan awm em le?

• • •

*Tin, ngai teh, Pathian biak in puanzâr chu
a chung lam atangin a hnuai lam thlengin a lo thler
chhuak ta a; tin, lirta a lo nghing a, lungpuite a lo khi chat a;
thlânta a lo inhawng a; mi thianghlim muhil tawhte taksa tam
tak pawh kaihtawhin an awm ta a; chûngte chu a thawhleh
hnuah chuan thlân ata lo chhuakin khaw thianghlimah
chuan an lût a, mi tam tak hnênah an inlâr ta a.*

Mat. 27:51-53

HINDU PUITHIAM AṬANGIN PRESBYTERY CHAIRMAN-AH

K.Lalrozama,

Nepal-009779815296980

Kum 2012 ‘Varshik’ Inkhâwmpui (Mizorama Presbytery Inkhâwmpui ang) chu tluang tak leh hlimawm takin kan hmang zo va. Inkhawmpui tiak zana Chairman kal chhuak Valedictory Sermon chuan Mizorama a awm lai a sawi tel chuan ngaihtuah a tithui khawp mai.

Pu Narain Prasad Sharma chu Bekhola khua, Miagdi District-a awm thin a ni a. Hna zawngin kum 1970 khan Mizoram a lût a. Maubaw, Aizawl-ah awmin Nepali-ho temple-ah Puithiam hna a thawk a, Puithiam hnam a ni baw a. Kum thum lai a thawh hnuah Lawipu lamah a awm thla leh a. Hna hrang hrang a thawh laiin Lal Isua chanchin a lo hre ta a. Ngun taka a inngaihtuah hnuah 29 July 1981 khan, chutih laia Bungkawn Bialtu Pastor Lalbiaktluanga kutah baptisma a chang ta a ni.

Kum 1995-ah chuan Nepal ramah a lêt leh a. Chutih lai chuan Nepal ram pawh Siliguri Field enkawl na hnuai a la awm a. September 1996-ah chuan Mission Field hnuai a rawngbâwltu pakhat a lo ni ve ta a. Rawngbâwltu tha tak niin Bharatpur-a a awm laiin Bial Inkhâwmpui Chairman pawh a ni tawh nghe nghe. Nepal Mission

Field hnuai a Kohhran inkhâwmpui lian ber chuan kum 2011 Chairman turin a ruat ta a ni.

Mi mal chanchin sawi lan kan tum ber a ni lo. Mizoram Kohhran leh thawktu chi hrang hrangte leh mi mal thahnem ngaite’n hnam dang hnêna Chanchin Tha in lo hrilh kha he lamah a rah kan lo seng a, a hlâwkna kan lo têt a, tawng lettu-ah kan hmang a, kan lo tangkaipui êm êm a ni tih kan sawi a ni. Lawmthu pawh kan sawi a ni.

Nepal Mission Field-ah hian a ram mi thawktu 42 an awm mêt a, chung zinga 17 chu Mizoram lama hna thawka lo awm tawhte an ni a. Anniho hi ringtu pawh ni lo, hna thawk tura lo chhuakte an ni. Hna hrang hrang an thawh laia Chanchin Tha Kohhranhote’n an lo hrilha Lal Isua ring tate an ni a, Chanchin Tha anmahni ram lama hril

châkin an lo lêl leh a. Tihian rawngbâwltu tha tak niin kan Mission Field pawhin a tangkaipui hlawm hle a ni. Mission-a thawk lem lo, kan Kohhran mi tangkai tam tak an awm bawk.

Katari Bial, Okhaldunga-a ringtu, Kohhran pawl zawm nei lova awmte chuan kumin kum tir lam atang tawh khan kan Kohhran an rawn hêl tan a. Fimkhur taka Bial enkawltuten an ngaihtuah hnuah October ni 14 hian lawm luh an tum ta a ni. An hruaitu ber chu Aizawl lo awm tawh, Presbyterian Assam Rifle Kohhran-a baptisma chang a ni.

Dharan Bial, Lucham Kohhrana Kristian hmasa ber chu Mizorama baptisma chang a ni, tunah ringtu

za chuang an awm mêk. He khuaah hian kan Kohhran ni lo pawl dang an awm lo.

Nepal-a Kohhran khaipa bera kan neih pakhat Pu Dambar Bahadur Rai, Chanchin Tha hril kawnga sul lo sutu chu Mizorama a awm laia ringtu a ni. Dharan Kohhranah amah bakah mi dang Mizoram chhuak an awm bawk.

Mangalbare khuaa kan kohhran zinga in 5 chu Mizorama an awm laia ringtu an ni. Heng lo pawh hi Mizorama an awm laia kristian, tuna kan Kohhran hmun danga awm an awm nual bawk. Mizorama an awm laia Pathian Thu an dawn dan te, ringtu an lo nih ve dan te ngaihnawm tak tak sawi tur tam tak a awm a, ziah sên a châkawm khawp mai.//

• • •

“Nimahsela Thlarau Thianghlim chu in chung a lo thlen hunah thiltihtheihna in la nei ang; tichuan Jerusalem khuaah te, Judai leh Samari ram khaw tinah te, kawlkil thleng pawhin ka thuhretute in ni ang,” a ti a.
Tirh. 1:8

SIKUL RAWNGBÂWLNA RAH

*Ziaktu: Vanlalzawma Khiangte
Asst' Area Promoter, Barak Area.*

Mi tam takte'n, "Sikul rawngbâwlna hi a insenso thlâk" an ti fo a. Dik zawng a dik reng e. Mahse he rawngbâwlna hi a tangkai êm êm a ni tih ka sawi hmasa duh a. Thufingte 22:6-ah chuan "Naupang chu a kalna awm kawngah chuan zirtir la, a puitlin thlengin a thlah lo ang" tih kan hmu a. Heti a nih chuan naupangte tuk tin zirtirtuten Bible thu thahnemngai taka an zirtirna hi a tangkai viau tur a ni lo'ng maw? Tawngkâ lamah 'Sikul chu *indirect Evangelism* a ni' tih te, 'tawkdarh chauh a ni' tite'n kan sawi fo thin. Tawk tarhah eng sa mah an awk nulh nulh ngai lo asin. Tin, naupangte hmaa Isua chanchin zirtirtuten kawla-ni-chhuak chhiara an lo sawi ve thin hi *indirect* a ni hauh lo. Naupang za tam rual hmaah *direct*-in Pathian thu an sawi a ni zawk. Naupangte hi sakhuaanaah an rilru an la pe thûk lo va. An nu leh pate vawn ang ang kha an vuan ve mai mai hrih a ni a. Anmahniin sakhaw biak an la nei mumal zawk lo. An lo puitlina, he khawvêl harsatnain a chim ve tak tak hunah, sakhua leh chawlhna an la zawng ve chauh dawn a ni. Chutih hun atân chuan an naupan laia Pathian thu an lo ngaihlthlâk thinte kha a la pawimawh dawn chauh zawk a ni. Nu leh pa leh Guardian tel lova khawsa thei lo na-nâ-na chuan nu leh pate sakhua an vawn ve mai hrih lo vah. Puitlin hnua Kristiana inlet tam ber hi naupan laia mission school-a zir thinte an ni fo a ni. Inlet chiah lo pawh Mission school-a zir thin hi chuan *moral support* hi an pe ngei ngei awm mang e aw ka ti. Chuvangin kei chuan Sikul rawngbâwlna

hi a pawimawh ka ti êm êm a ni. A taka kan hmuh theiha Sikul rawngbâwlna tangkaizia tlêm han târlang ila. Cachar Tlângrama Winchester school-a naupang zir chhuak tam tak, Hachhek tlângdung Mizote leh a chhehvela kan tlangmi pui zingah tunah hian Missionary-ah mi 8 an thawk mêk a. Tin, Mizo

Synod hnuaia Pastor thawklai pakhat Rev C.S. Rila kan nei a. B.D. Pass tawh mi 2 an awm baw. Heng bakah hian *Native workers* anga kan Mission hnuaia thawk mi eng emaw zat an awm mêk baw a ni. Cachar Tlângrama khaw hrang hranga Kohhran hruaitu leh hnarkaitute khu an vaiin ti ila a sual awm lo

ve, Winchester school chhuakte an ni. Tin, Noagang, Tripura-a Bethlehem English Sikul-a zir chhuakah tunah hian Lianzamthang Ranglong B.D. zir zo tawh kan nei mêk baw a ni. Tin, Mission Sikul-a zir chhuak sawrkar hna tha tak tak thawk Tripura-ah khuan mi eng emaw zat an awm tawh bawk.

Thil dangdai deuh mai Pakhat chu Oriental High school-a tun kum 2012-a Class-IX zir mêk mipa naupang O.Bikash, Itkhola venga cheng chu a nu leh pate'n "Ani hi chu kan sakhuaa kan pathian a be ve duh lo. Oriental School Jisu (Isua) chauh a be duh a. Puja pawh a duh ve lo" an ti a. Tunah hian kan Evangelist-te'n an inah lengin an kawm thin a. A nu leh pate pawhin tihngaihna an hre lo. An sakhuaah chuan an chan loh turah an ngai mai a. A nu leh pate nen lungrual taka Kristiana inpe turin beih mêk an ni.

Naupangte rilrua Chanchin Tha tuh hian awmzia a nei hle a ni. Zirlai an nih lai chuan an tan sakhaw dang biak erawh a rem

thin lo a ni. Nu leh pa, Guardian chawmtu an mamawh a. Zirlai an la nih chhûnga kristiana inlet an nih chuan an tan buaina tawh tur a tam êm êm a ni. Tunah ngei pawh hian Silchar khawpui chhûnga mi tlangvâl tleirawl Anurag Das, B.Com zirlai chu 2011 khan ama duhthlannain a nu leh pa hriat lohvin Kristianah a inpe a, Baptisma chantir a ni a. Rei tak chu a nu leh paten an hriat loh avângin inkhawm, Thalai programme-ah engkimah *regular* takin a tel a. Amah pawhin nuam a ti êm êm a. Tunah erawh chuan a inzêp sêng ta bik lo va, a nu leh paten nasa takin an khuahkhirh a. Inkhawm pawh a duh angin a inkhawm mumal thei lo va. B.Com *final exam* mai tur a ni nen, *tution* la pawhin a chhuak hlei thei ta lo. Ani ang hi thalai nu leh pa hriat lohva baptisma chang kan nei nual a. Harsatna tâwk mêk mi dang pawh an la awm a ni. Tawngtaipui an ngai. Eng pawh ni se ka sawi tum ber erawh chu Sikul naupangte zinga rawngbâwlna tangkaizia Chiang taka chhiartute hnêna tarlan hi ka tum a ni. //

• • •

".....Chutiang bawkin thil tha tih lang nghal a awm a, lang nghal rih lo mah se thup hlen theih a ni lo.....1 Tîm. 5:25

GHUMAONETAAR HMUNA FIELD PUM HUAP GOSPEL CAMPAIGN

*Rev. B. Zobiaktluanga,
Field Secretary, Siliguri Mission Field*

Thuhmahruai

Siliguri Mission Field chhûngah hian Field Working Committee-in Field pum huap Gospel Campaign neih rilru a putna a rei tawh a, mahse 2011 kum khan harsatna chi hrang hrang a awm thin avângin kan ti thei ta lo.

Kum 2012-ah erawh chuan Pathian khawngaihna zârah Ghumaonetaar, Darjeeling district hmunah kan nei ve thei ta a, a lawmawm hlein kan hria. Ghumaonetaar hi thingtlâng khua, khaw dang eng emaw zatin a hual vel a ni a, a thlang lawkah Gairigaon khua a awm a, kan Missionary Evangelist Gideon Tamling-a awmna a ni. Siliguri a tanga km 50 vêl a hla, motor-a darkar khat vel tlan ngai a ni. Thingpui huan kara awm a niin khaw mawi tak a ni. He khua leh a chhehvela chengte hi Nepali deuh vek an ni.

Hma lâk dan:

Field Working Committee chuan uluk taka ngaihtuahna hmangin programme a ruahman a, a mawhphurtu bikte siamin a hun atân September ni 11-14, 2012 ruat fel a ni ta a.

Hun hman dan:

Chipchiar vak lo mahse kimchang zawkin tawi tea report theih ka ring, hetiangin:

11th September, 2012 ni hian chhun chaw ei khamah Pastor K. Zoramhlua kaihhrainain

hawngtairualna nen bul kan tan a, zan dar 7:30-ah Evangelist Benjamin Alley-a kaihhrainain inhmelhriatna programme hman a ni a; Kohhran member-ten Pathian fakna hla sain leh Kristian hla hmanga hnam lâmtê entir a ni a, mipuite hnêna Chanchin Tha hmelhriattina hun hman a ni. A tawpa Bible *film* entir nghal a ni.

12th September, 2012 ni hi an hawngtairualna neih a ni a. Hemi zawh hian hnattlâng neih a ni a, khawtlâng kalkawng

siamthain, sikul leh *health centre* bul vêl tihfai a ni. Zing dar 10:00 a tangin *Free Medical Clinic* neih tan a ni a, damlo inentir an thahnem hle. Tlai lamah inkhawm *programme* hman a ni a, Evangelist Gideon Tamling-a kaihhruainain hnam lâm te, fakna hlate, lemchan leh Pathian thu puanchhuahna hun hman a niin mipui pawh an kal tha hle.

13th September, 2012 pawh tawngtairualna nen bul kan tan a, *Free Medical Clinic* nei lehin damlo inentir pawh an thahnem leh hle a, a hlâwk hlein kan hria. Tlai lamah kan thawktu thenkhatte tualchhûng thalaiho nen *football* an khel ho va, an rin aiin kan nauten an thiam si a, min ngaihsan phah a, a tangkai ta hle a ni. Zan lamah Evangelist Kiran Rai-a kaihhruainain inkhawmna kan nei a; hnam lâm te, fakna hla te, lemchan te leh Pathian thuchah sawina nen hun kan hmang leh a, khaw mipui pawh an lo kal thahnem leh hle.

14th September, 2012-ah *campaign* neihna hmun chu kan chhuahsan a.

Tlipna: He rawngbâwlina a tang a hlâwkna kan hmuhte

tawi tê têin han sawi ta ila: Kan hruaitu Pathian thatzia a lang Chiang hle a, tan ni a tang khan ni tin ruah a sur a, mipui kan duh angin an lo kal hma thei lo va. Kan Evangelist pawh a thahnemngaih lutuk vang a ni ang, a beidawng lek lek thin a, hnem a ngai fo mai. Pathianin kan *campaign* hi a thlawn a nih mai a phal lo va, a hun takah ruah sur pawh a bang zel a, ni tinin mi an pung chho zel a, a tawp zanah phei chuan *hall* chhûnga leng lo khawp kan inkhawm.

Kristiante chungchângah a khaw mite ngaihdan kan thlâk thei. Mi thenkhat min hrilh danin, “Tun hma pawhin Kohhran pawl danga mi tam tak lo kalin thute an sawi thin a, mahse min hip ngai lo; a chhan chu setana pawl, milem bia ang zawngin an thu sawinaah te hian min chhuah thin a, kan duh bik lo. Nangni erawh chuan, wawi khatmah chutiingin min ti lo va, thu chauh pawh in sawi lo va, hnatlâng te in neiin khawlai bawl

hlawh leh hnawk vel in tifa a, a hmaa mite nen in inang lo.” an ti a ni.

A hmuna thawk kan Evangelist-in a hnua a sawi chu- “Puitu nei lo thawktu mal lek angah miin min ngai thin a, kekawr bul leh chappal nen chuan min ngaisang vak lo thin a, *campaign* kan neih takah chuan ka *suit* ka ha chhuak thei a, thawktu dang (Mizo, Nepali, Adivasi, Rajbongshi adt.) heti zozai thawhpui ka nei tih an hriatin tunah chuan min dah sâng ta hle a, ‘**Hero**’ ka ni ta ringawt.” a ti.

Kohhran pawl danga mi fakna hla sa tura kan sawm Tv. Ajay Rai chuan min pui nasa a, hnatlâng leh *Free Medical Clinic* kan neihnaah te a tulna apiangah min pui a ni. *The Man Called Jesus (T.M.C.J.)* pawlte chungah pawh kan lawm hle. Kan *speaker* Rev. Dr. B.D.Rai-a chungah

pawh kan lawm hle, mite’n an ni tin nuna an mamawh hriselna leh kawng hrang hrang hmanga Chanchin Tha a sawi thiam dan hi a fakawm hle a, a ngaithlatute thinlung pawh a khawih hle niin kan hria. Dr. Dibakar Sinha pawhin ni hnih lai min pui a, kan lâwm hle.

A tawp berah chuan kan *field* thawktu zawng zawngte chungah *field* hmingin lâwmthu ka sawi duh a, *department* hrang hrangah thenin mawhpurhna kan pe theuh va, hlenchhuahna kawngah Pathian tanpuinain an tlin hle niin ka hmu. Kan *nurse* pakhat pawh khawsik chung chungin *clinic*-ah a tel ve a, a fakawm hle. Hatiadanga bial chhûngah harsatna a awm avânga an thawktute an lo tel thei lo erawh chu a pawl kan ti hle. Kan *field* chhûng leh Mizoram Kohhranho min tawngtaipui rengtute chungah pawh lâwmthu kan sawi mawlh mawlh a ni.//

• • •

*Tichuan, mi tin ei leh in leh an thawhrimna
zawng zawnga hlim taka an awm chu
Pathian thilpêk a ni....
(Thuhriltu 3:13)*

MISSIONARY CHÈNNA IN KÂNG

-Sawma L Pachuau

Arunachal & Assam Mission Field 'W' chhûnga Siyum Missionary chenna In kan dan chungchangah media leh chanchin thar thenkhatah *current short* vanga kâng niin sawi a awm a. Kan missionary chhiat tawkte leh a hmuna hmutute kê a tanga thu kan dawn dan chanchin kimchang chu hetiang hi a ni e.

Ni 27.12.12 zing dar 2 a.m. vel khan Lalsangpuiin an ui vulh bauh vak vak ri chu hriain a tho chhuak a. An in bang chhak lam, kawngpui hnaih lam lo kang hluah chu hmuin Zari te nupa mu lai chu a va kai tho nghal a. A lo kan nasat tawh avangin thelh chi rual a ni tawh lo va, Zari pasal Dika chuan an mutna bula thingrem chu a pawm chhuak lawp a, Zarin an *woofer speaker*, kawngka bul hnaia mi chu a pawm chhuak bawk a. Sangpuiin *electric heater* a chawi chhuak nghal bawk a.

Tichuan, Sangpuii chu kawngpui lamah tlan chho nghalin an thenawma kross sipai Tarin Ikke te chhungkua chu a va kai tho leh nghal a. Tichuan, a tlan let phei leh nghal a, a va thlen phei leh chuan an in chu a chhûnga luh rual lohvin a lo kang tawh a ni. An tlan chhuahna lamah hian Sangpuii ke a kang a, Zari pasal Dika kut pawh a kang bawk a ni.

An thenawm in hnih a kang tel bawk a, kan kohhran mi leh sa te ve ve an ni a, pakhat phei chu kross sipaia chhawr lai Tarin Ikke te in a

ni. Anni hi in sak that leh mêk tuma intuak chho mêk an ni a, chumi atana an dah that an rangva chu chu tlem azawng an thiar chhuak hman a. chumi tih loh chu engmah bungrua chuh hman lohvin a kang ral vek a ni.

A hmuna hmute sawi danin *current short* ni lovin tute emaw hal ngei nia hriat a ni a, hal luih ve reng a ni nge tihpalh thil thua tihkan tih erawh hriat a la ni lo. *Current short* vanga kang a nih theih lohna chhan chu, a kan tanna lamah hian *electric wiring* pakhat mah a awm lo va; tin, in chhûng lamah mei eng mah

hal a ni lo bawk. In zatve vel lai a kan tawh hnu pawhin in chhûnga *electric* chu a la êng reng tho a ni. Hruì pui a tanga *electric* hi lain an in chung chhip zum lai takah a lût thla a, bang chhak lam pang nen a inhnaih lo a ni. Pathian kawngaihna leh missionary te inpekna, thahnem ngaihna avangin Siyum khuaah hian Presbyterian kohhran hi a t̃hang chak êm êm a, kohhran dangte thîk tham hial a tling chho ve tawh a ni. Siyum khuaah hian quarters awm hmain mi in luahin kan missionary-te hi an khawsa thîn a. Mahse, in neitute fapa leh khawtual mite kut tawrh leh tihbuai an nih thîn avângin 2012 June thla khan he in ding lai hi a ram tel lovin Rs. 30000/- in lei a ni a, July thlaah an luah lût a ni. Hemi quarters-a an awm hnu pawh

hian eng eng emaw harsatna an tawh reng a, a changin an inte an rawn vawm a, a changin an bangte hmawlhthen an rawn hawlh thîn a ni. Tun hnaiah pawh krismas leh kum thar inbuatsaihna atan krismas hma a t̃ang khan zan tin kohhran mite leh thalaiten zai leh lam an zir thîn a. Hetia an zir lai pawh hian lunga vawm leh eng eng emaw harsatna an tawh reng a ni. Kohhran dang, he khuaa lo lût hmasa zawk te pawh an awm a, chutih laiin, keini kohhrante'n harsatna kan tawh ang hi an tawh ve lem lo niin an sawi a, tun hma deuh a t̃ang khan hetiang harsatna neuh neuh hi kohhran hoten an lo tawh fo tawh a ni. Tunah hian Evan. Lalsangpuii leh Zarzokimi te nupa hi Daporijo-a Pastor quarters lamah lak phei rih an ni.

NURSE CHÊNNA IN KÂNG

Ni 8 January, 2013 zan dar 11:00 vêl khan Manikbond, Cachar Tlângram kan rawngbâwlina hmuna Nurse Chenna In, luahtu la awm rih lo, mahse in chhûng bungrua leh Medical lam thil pawimawh engkim dahna chu vanduaithlak takin a kang ral vek a, bungrua eng mah chuh hman a ni lo.

(Heng ang vanduaina kan Field chhûnga lo thlengah hian Kohhranhovin t̃awngt̃ai leh thilpeka t̃an kan lâk a t̃ul hle...Ed.)

• • •

FIELD TLAWH REPORT**A:**

1. Field hming : Tripura
2. Khua/Mission Center : Tusakapur
3. Thawh hun chhûng : Ni 23-28 Nov. 2011
4. Tlawhtu Kohhran : Venglai Kohhran, Khawzawl
5. Kal zat : Mipa - 22 Hmeichhia - 4
6. Tlawh chhan : Work Camp
7. Hnathawh/Thiltih : Biak In hmun tur laih
8. Senso : ` 73,902/-

9. Lawmna lam: An Kohhran an fahrah hle a, mahse Biak In hmun laih chhûng hian a theih ang angin min pui thin a, an hlimin kan hlim tlang thei hle a. Mahni inkulhin ei leh in zawng zawng kan intum a, Field thawktute an lawm hle.

10. Report tul dang: 1) Tusakapur hi Tuidu Pastor Bial chhunga mi a ni a. Tuidu atanga km 5 vela hlaa awm a ni. Biak In hmun hi ni 2 laih a nih hnuah zan dar 8 atanga dar 11 thleng JCB-in laih a ni a, laih zawh vek a ni. A penna kawng pawh laih nghal vek a ni. Tuidu Pastor Bial-ah hian Kohhran Biak In hmun JCB-a laih hmasa ber a ni. Tuidu-ah hian Khawzawl Venglai Kohhrana mi Pu Ramchhanngama Missionary (Principal Calvary H/S) a awm mek a, ani leh a thawhpuite'n min lo dawngsawng tha hle.

2) Pandunga Kohhran Pulpit siam a ni bawk.

Report petu
Vanlallawma, Secretary
Venglai Kohhran RT. Committee
Khawzawl.

Aw:

1. Field hming : Home Mission 'N'
2. Khua/Mission Center : Vawngawnzo Branch Church
3. Thawh hun chhûng : Ni 21-26 Nov. 2011

4. Tlawhtu Kohhran : RT Comt. Tanhril Vengthar Koh.
 5. Kal zat : Mipa - 10
 6. Tlawh chhan : Work Camp
 7. Hnathawh/Thiltih : Biak In sak
 8. Senso : ` 18,705/-

9. Lawmna lam: Biak In sak Work Camp kan neihnaah hian bul țana hma lain, Foundation, Tie-beam, Scarting-te chhûng zovin, Inchhun leh Collar-te siam a ni bawk a. Biak In len zawng hi a dung 48 ft leh avâng 30 ft. a ni. Vawngawnzo Kohhran mipuite an thawhhona a ța hle a, an inlunguala an inpumkhatna pawh a ța hle. Kohhran chhûngkaw in leh ram nei lo ram an leisakin in an saksak bawk a, an rawngbâwlna a fakawm hle mai.

10. Report țul dang: 1) He khuua kan awm chhûng hian Bialtu Pastor C.Lalthanzara'n chhûngkaw khat member 5 awmna Baptisma a chan tir a. Zan tin inkhawm țin a ni bawk.

2) Kan haw hnuin Kohhran Committee dilin Kohhran chhûngah Bible, Hla bu leh Thawmhnawte khawn khawm a ni a, Kohhran mipui tan thawn thlâk a ni. Evan. Zoramthanga, Vawngawnzo Kohhran ziaktu hnên ațangin lâwmthu sawina dawn a ni.

Report petu

Lalchhandama, Secretary

RT. Committee, Tanhril Vengthar Kohhran

B:

1. Field hming : Home Mission 'S'
 2. Khua/Mission Center : Kakichhuah
 3. Thawh hun chhûng : Ni 4-10 Apr. 2012
 4. Tlawhtu Kohhran : Ramhlun Venglai Kohhran
 5. Kal zat : Mipa - 3 Hmeichhia - 2
 6. Tlawh chhan : Good Friday leh Easter Sunday
 7. Hnathawh/Thiltih : Good Friday leh Easter Sunday-
 ah hian Pathian biao inkhawm leh inpawlhona hlímawm tak neiin

Group zai, solo, zaipawl leh thil tih chi hrang hrang hmangin hun hlimawm tak hman a ni a. Easter Sunday-ah chuan naupang 50 velin Budhist vengah kawng zawhin hnehna an puang a, tawngtai rual leh Pathian faka zaihovin Easter Sunday ruaite thehin hun hlimawm tak kan hmang. Kohhran tanpui nan cheng 2,000/- leh Missionary-te cheng 300/- pèk an ni bawk.

8. Senso : ` 42,495/-

9. Lawmna lam: Kakichhuah Vengthar hi in 60 vel an ni a, Khumi hnam niin Presbyterian Kohhrana awm deuh vek an ni.

10. Report t̃ul dang: Kakichhuah Vengthar bulah hian Budhist Veng hran a awm ve bawk. Kakichhuah-ah hian kan tlawh Missionary 3-te hian Pawl IV thleng zirna school an enkawl a, school leh thawktu quarters tihphuisui a t̃ul hle.

Report petu

C. Lalniliana, Secretary

Ramhlun Venglai Presbyterian Kohhran

CH:

1. Field hming : Karbi Anglong
2. Khua/Mission Center : Diphu
3. Thawh hun chhûng : Ni 11-14 Apr. 2012
4. Tlawhtu Kohhran : Bethlehem Venglai Kohhran, Azl
5. Kal zat : Mipa - 9 Hmeichhia - 1
6. Tlawh chhan : Kan Kohhran a t̃anga kal Pi Laltlanmawii rawngbâwlina hmuhpui pahin kan kal.
7. Hnathawh/Thiltih : Good Friday leh Easter Sunday kan hmanpui.
8. Senso : ` 30,000/-

9. Lawmna lam: Thil dang hmasawnna bakah an sikul result-te a t̃ha a. Kuminah pawh admit sen loh naupang an nei.

10. Lawmawm lo lam: A rammite'n hmun laili leh t̃ha lai chang

mang lova, a tam zawk daipawn lama an khawsa hmuh hian Pathian an mamawhna a lang.

11. Report òl dang: Mission Field tlawha Mizoram aṅanga kalte'n thawktute tihautak lo zawnga hun hman thiam a òl hlein a lang. Work Camp a ni emaw kan thleng darh a nih pawhin intodelh tum hram a ṭha.

Report petu
R. Rokima, Secretary
Bethlehem Venglai Kohhran, Aizawl

D:

1. Field hming : Home Mission 'S'
2. Khua/Mission Center : Putlungasih
3. Thawh hun chhûng : Ni 10 -14 Apr. 2012
4. Tlawhtu Kohhran : Maubawk 'W' Kohhran, Azl
5. Kal zat : Mipa - 12 Hmeichhia - 2
6. Tlawh chhan : Work Camp
7. Hnathawh/Thiltih : Biak In Ceiling siam
8. Senso : ` 37,500/-
9. Lawmna lam: Thawktute leh Kohhran Committee-te'n ṭha takin min lo dawngsawng a, zanriah min lo buatsaihsakin kan thlen zan dar 11 velah hlim takin chawhlui kan kil ho a ni. Kan hnathawh chhûngin Tualchhung Kohhran lam aṅangin mi eng emaw zatin ni tin min ṭawiawm reng bawk a ni.

Report petu
K. Sanghnuna, Secretary
Maubawk 'W' Presbyterian Kohhran, Aizawl

E:

1. Field hming : Barak Area
2. Khua/Mission Center : Bamon Leikai Kohhran
3. Thawh hun chhûng : Ni 9 -14 Apr. 2012
4. Tlawhtu Kohhran : Pavalai, Ramhlun Vengthlang

5. Kal zat : Mipa - 5
6. Tlawh chhan : Work Camp
7. Hnathawh/Thiltih : Bamon Leikai Kohhran Biak In a dung 30 ft, avâng 18 ft, a chung rangva a ni a. A bangah dap hman niin, bangrel nei lo, a ban leh beam-ah a bang chu khai a ni a, a bang dap chu Teak a thlāk a ni.
8. Senso : ` 78,680/-
9. Lawmna lam: Bamon Leikai Kohhran hi member 60 vel chauh an ni a. Sunday School leh Inkhawmah chuan a tângpuiin mi 40 vel an inkhawm thin a. Kohhran an tlēm hle naa, an lungrualin Work Camp chhung zawng hian min tawiawm tha hle a ni.
10. Report tui dang: Bamon Leikai Kohhran hian Tuikhur an nei lo a, Tlawng lui atāngin tui an pump mai thin a, fur ruah tui tlāk lai chuan a nūin, pump tlāk a ni lo va, ruah tui rin a ni. Tui an neih theih dan tur ngaihtuahsak an ngai hle.

Report petu

H. Liankhuma, Secretary
Presbyterian Pavalai Pawl
Ramhlun Vengthlang Kohhran

F:

1. Field hming : Tripura
2. Khua/Mission Center : Ambassa
3. Thawh hun chhûng : Ni 15-21 May, 2012
4. Tlawhtu Kohhran : Lungpho Kohhran
5. Kal zat : Mipa - 13 Hmeichhia - 3
6. Tlawh chhan : Ramthar Committee leh Kohhran tihchak nan
7. Hnathawh/Thiltih : School Ceiling siam
8. Senso : ` 50,000/-

9. Lawmna lam: Thawktute'n min tawiawm tha a, kan mamawh apiang mai min ngaihtuahsak a, kan inpawh tlâng hle a, a nuam kan ti.

10. Lawmawm lo lam: Ambassa bial Kohhran thenkhat te, ringthar rethei tak tak te, Biak In rap in mai mai a inkhawm thin te tanpui an ngai hle.

11. Report tul dang: Tripura Field pum pui hian Jan - May thleng hian ringthar mi 700 laiin baptisma an chang tawh a, 2012 chhunga ringthar target engemaw zat khum an beisei, an rawngbawlina leh an inpêkna a nasaa an chhuanawm takzet a ni.

Report petu

Upa H. Lalsangliana, Chairman

Lungpho RT Kohhran, Aizawl

G:

- | | |
|------------------------|----------------------------|
| 1. Field hming | : Karbi Anglong |
| 2. Khua/Mission Center | : Rongnihang |
| 3. Thawh hun chhûng | : Ni 11-15 June, 2012 |
| 4. Tlawhtu Kohhran | : RT Comt. Tuikual Kohhran |
| 5. Kal zat | : Mi - 10 |
| 6. Tlawh chhan | : Work Camp |
| 7. Hnathawh/Thiltih | : Biak In sak |
| 8. Senso | : ` 31,300/- |

9. Lawmna lam: Bialtu Pastor leh thawktute'n min lo dawngsawng tha hle a. Hna kan thawh chhung zawng tul dangte kalsana min tawiawm avângin tuang takin kan thawk thei a, kan lawm hle. Biak In chhak lei nan hian Zotlâng Presbyterian Kohhran, Aizawl-in cheng 40,000/-in an tanpui. Rongnihang khuaah hian ringtu, Kohhranhote an tam lo naa an inpêkna a thûkin an ding nghet hle.

Report petu

R. Zirkunga, Secretary

RT Comt. Tuikual Kohhran, Aizawl

NG:

- | | |
|------------------------|----------------------------|
| 1. Field hming | : Home Mission 'N' |
| 2. Khua/Mission Center | : Bukvannei |
| 3. Thawh hun chhûng | : Ni 22-26 May, 2012 |
| 4. Tlawhtu Kohhran | : Thenzawl Dinthar Kohhran |
| 5. Kal zat | : Mipa - 19 Hmeichhia - 2 |
| 6. Tlawh chhan | : Tirhkoh Quarter sak |
| 7. Hnathawh/Thiltih | : Assam tupe: 30x18 ft |
| 8. Senso | : ` 30,894/- |
9. Lawmna lam: 1) Work Camp zawh Pathianni SS-ah Bukvannei Kohhran inkhawm nasa takin an pung a, puitling 20 vel chauh inkhawm òin kha 45 lai an inkhawm a ni tih report Missionary Pi Thangchhingpui te chhungkaw hn?n atangin kan dawng a, kan lawm hle.
- 2) Keini a tlawhtu Thenzawl Dinthar Kohhran chuan Workcamp kan vawi khat neihna a nih bakah May, 2012 Pathian Ramthar thawh lawmah hun danga kan thawh òin nasa takin kan khûm bawk a, kan lawm tak zet zet a ni.

Report petu

R. Lalmuansanga, Secretary

RT Committee, Thenzawl Dinthar Kohhran

(Kan Chanchinbu a têt deuh avângin Field tlawh report chhuah chàkawm tak tak, kan chhuah thei mai òin lo hi a pawl kan ti a. Field tlawh hun inkâr hlat tak tak chhuah a nihna chhan hi report dawn dan indawta tihchhuah a nih vang tih in lo hriat loh kan duh lova, a tuikang nghaha rawn tihchhuah òin a ni e....Ed.)

ZAWHNA LEH CHHÂNNA:

Z= Nov. 2012 Ramthar phêk 13-na ‘Thlânlung lum sawn...’ tih thupui a, Rev. Sairêngpuia’n an chhûngkaw inthendarh hun a sawi, ni 14 June, 2010 leh Phnom Penh Airport a thlen ni 15 June, 2012 hi a va inkâr hlat ve, kum 2 chhûng a kal tihna em ni? - Ph. No. 9436157738

Chh= A ni ngawt mai, ama chhânna hi a ngai ngaiin aw niang, “a ni maw? ka lo hre hlei nem, a va mak ve aw! a nih hi...ka copy kan en a, 2010 ka lo ti kulh pek a, chutiang anrawn hre nalh chu a lawmawm e ti tawh mai ang.” (*Keini pawh kan lo fimkhur tawh ang e.....Ed.*)

Z= Nov. 2012 Ramthar phêk 22-na ‘Jharkhan Mission hmasawn dan’ tih Rev. Zosaphara, Fld. Secy-in a ziaakah khan a bul ñanna ‘Kum 1998-99 khan...’ tiin a ziaak a. Tlar 9-naah ‘Kum 1993 aţang chuan.....’ tiin, Pu R. Vanlalchhanhima hova hmalâk a nih thu a sawi leh bawk si hi hriatthiam a va har ve, min sawifiahsak thei em?

Chh= A ziaaktu Rev. Zosaphara’n, “ ‘Kum 1998 - 1999’ tih hi ‘Kum 1989-1998’ tih zawk tur a ni e” a ti.

• • •

SYNOD BOOKROOM BOOK NEWS

1. Duhthusam hlawhtlintir dan : Nunphung leh khawsakzia thlak danglam dawrh thei, hma lam hun thlirna eng min pea beiseina nung min siamsak thei lehkhahu Pastor thuhrlitu leh ziaaktu lar Dr. Norman Vincent Peale a buatsaih hi lo chhiar ve teh. ‘Hlawhna kulhpui tihchhiat dan’, ‘Hlawhtlinna kailawn pathum’, ‘A eng zawnga thlirna nung a nghawng dan’ leh ‘Ring tawp mai rawh’ tihthe hi chhiar hmaih chi a ni lo. Aman Rs. 120/-

2. Chicken Soup for the Soul Bel 1-na: Mite’n an zawn huai huai, a lettingtu Dr. Rualthankhuma meuh pawhin a neih tawh loh, Chicken Soup series zawng zawng min ngaihzawntir thei khawpa \ha, Chicken Soup for the Soul Bel 1-na kha chhut nawn a niin peih fel a ni ta! He lehkhahu hian a chhiartute thinsungah hmangaihna te, inlaichinna tha te, lawmna te nei turin thathona min pe a ni. A man Rs.150/-

3. Vanram hi a tak tak a lo ni : Mipa naupang pakhat Colton-a, Nursery naupang rual lek, raipuar a hmuh pawh a, “Ka pa, he nu hi a va thau ve,” tia an puma kaw k mai rual lekin vanram a fan chanchin ziahna a ni a. Khawvel mipui ngaihven a hlawnin copy nuai 50 chuang hralh chhuah tawh a ni. Han chhiar ve teh le. A man 100/-

4. Beidawng suh : Beidawng ngai lo mi tumruhte chanchin, tunlaia Sap Pathian thu hrlitu lar, Local Cable T.V. lamah pawh kan hmelhriat em em Joyce Meyer ziah, Zothanmawia Khiangte lehlin hi chhiar la, i nunah hlawnka eng emaw tal i paw chhuak ngei ang. A man Rs. 150/-

5. Chung lamin min ngawihsan lai hian : Mizo lehkhabu ngaihnaawm tichhuak thintu J.F Junior-a'n kutthlakna thama a ngaih tawhna lehkhabu hi chu rin ang ngei hi a ni leh \hin. He lehkhabu thute hi a fapa a intihlum avanga Ronald Dunn-a'n Pathian hnen atanga a dawn a ni a. Chu sap pa thu dawn chu Mizo mipuite'n kan dawn ve min duhsak avangin J.F. Junior-a hian min lehinsak ta a ni. Aman Rs. 150/-

6. Tiam tlat e i tih hmain : Sex Drive hi sual a ni em? Engtin nge hmangaihna kan inhlan ang? Engtin nge kawppui kan dil ang? Kawppuite mize hriat dan tur dik tih te leh Pathian duh dana kawppui zawn dan chungchanga kaihhraina dik i hriat duh chuan tunlai \halaite lehkhabu chhuak thar Dina Chawngthu ziah hi i lo hmelhriat dawn nia. Aman Rs. 100/-

7. In chungkua in dam tlang em? : Dam nan damdawi chawh thiam kan ruai a; mahse kan chungkua eng ruai kan ang thei si lo. Damna turin damdawi tam tak kan hman thlawn ta. Thinghnai damdawi hnawih chi la turin Gilead-ah kan kal mai dawn em ni? Engtin nge ni ang? Dr. R. Lalauva buatsaih Rs. 80/- man a ni.

8. Chhandamna Kailawn : Mi \henkhat hi chuan Pathian thu pawh sawi chiam mah se, anmahni mihring an inlantir ropui chiam \hin a. Rev. H. Lengluta erawh chuan a thu leh hlaah te 'ka' tih hi han hman ve bawh \hin mahse, a sawi kual tam poh leh Pathian a ropui a, Kraws a langsar leh \hin. 'Chhandamna kailawn' a hre fuh hle pawh a ni ang. Lo hlawkpui ve rawh le. A man Rs. 100/-

9. Scientist hmingthangte : Mi ropui, Scientist kan tihte hi a \hen chu chhungkaw hausa tak atanga seilian an nih laiin a \hen chu chhungkaw harsa tak a\anga chawrchhuak an ni thung a. Lehkha thiam thei tak tak an awm laiin \henkhat chu an naupan laia an thiam theih loh avanga nu leh pa leh zirtirtute rilru tihahnu an ni. Kum BC 500 vel a\anga tunlai thlenga Scientist ropui leh hmingthangte chanchin hi ngun taka i chhiar chuan an lo hlawhtlin theih dan leh mite tana malsawmna thlentun an lo nih theih dan thuruk eng emaw tal i chhar chhuak ngei ang. Dr. R.K. Lallianthanga buatsaih Rs. 120/- man a ni e.

10. Nghet taka ding zelin: Mizo zinga kan mi thiam langsar leh tawnhriat ngah, IAS ni bawh, Chief Secretary leh MPSC Chairman hial lo ni tawh Pu M. Lalmanzuala chuan ama chanchin leh a hringnuna a thil tawn ngaihnaawm tak tak chu mi tin hnenah min tlangzarhsak ta. Politics leh hnam nun veitu tan chhiar ngei chi a ni e. A man Rs. 250/-



*Cachar Tlângram, Zaite khuaa Missionary-te
an Lirthei neihchhuna chuângin rawngbâwlin
an feh chhuak...an va fakawm em!*



*2012 Nepal Mission Field
Missionary-te*

RAMTHAR

TO

If not delivered please return to:

The Manager,

Ramthar Chanchinbu

Synod Office, Aizawl, Mizoram, India.

Pin-796001 (Ph. 08575913800)

*Published by Rev. Lalthuanmawia and Printed at the
Synod Press, Aizawl on behalf of Ramthar Association,
Aizawl, Mizoram. Copies - 25,500*

Visit us : www.mizoramsynod.org